

四庫全書

子部

欽定四庫全書

子部  
居易錄卷十六

詳校官侍讀<sub>臣</sub>陳崇本

員外郎<sub>臣</sub>牛勣文覆勘

總校官中書<sub>臣</sub>朱 鈐

校對官中書<sub>臣</sub>方大川

謄錄監生<sub>臣</sub>范光謙

謄錄監生<sub>臣</sub>范 墉

欽定四庫全書

居易錄卷十六

刑部尚書王士禎撰

山谷有陶商翁碑在粵西之興安見鄒道鄉集未悉陶何如人也讀劉後村詩話載其詩五言如梟鳴社旁樹盜發家中金煉成丹竈在騎去鶴巢空七言如山險未能留伯業水聲惟解送年華將老未聞金作印師寒猶用鐵為衣皆警策

予嘗義子美八哀詩後村詩話先已言之曰如鄒楚之

類每篇多無詞累句或為韻拘殊欠條鬯不如飲中八仙之警策蓋八仙歌每人止三兩句八哀詩或累押二十韻以此知繁不如簡大手筆亦然又云八哀詩崔德符以為表裏雅頌中古作者莫及韓子蒼謂其筆力變化與太史公諸贊方駕惟葉石林謂長篇最難魏晉已前不過十韻常使人以意逆志初不以叙事傾倒為工此八篇本非集中高作而世多尊稱不敢議其病蓋易令多口李上海集原月篇中多累句則去其半方為

石林之評累句之病為長篇者不可不知右皆確論與  
予意脗合

張嶠巨山評山谷云譽者或過其實毀者或損其真皆  
非真知魯直者魯直自以為出於詩於楚詞過矣蓋規  
撫漢魏以下者也佳處往往與古樂府玉臺新詠諸人  
所作合古律詩酷學少陵雄健太過遂流入於險怪  
要其病在太著意欲道古今人所未道語爾其文專學  
西漢惜才力褊局不能汪洋超超如其紀事立言頗有

類處此論極公但以山谷似玉臺新詠擬非其倫矣

辛稼軒詩傳者甚少後村又記其一聯云身為僧禪老家因赴詔貧稼軒墓在鉛山州南十五里陽原山中見研北雜志

福州仁王寺有僧喜唱望江南詞一日忽題壁云云或言於當路延主一刹久之不樂又題詩云當初只欲轉頭銜轉得頭銜轉不堪何似仁王高閣上倚闌閒唱望江南李內翰每稱之倦遊輒曰吾欲唱望江南矣此與

不暇唱渭城語相似而僧詩特佳

鄭清之安晚集六十卷茲本僅古近體詩第六卷至第十二卷殘缺多矣詩多禪語清之相理宗召還真西山魏鶴山諸君子時號小元祐亦南渡賢宰執也

元黃鎮成元鎮秋聲集四卷子愛其秋風詩云秋風浙浙生庭柯蕭蕭木落洞庭波紅樹夕陽蟬噪急白蘋秋水雁來多王孫不歸怨芳草山鬼欲啼牽女蘿蒹葭蒼蒼白露下望美人兮將奈何又李仲明秋山小景云家住

夕陽三峽口人行秋雨二嶠間不知何處真堪畫移得  
柴門對楚山五曲精廬云歌棹曾窮九曲源精廬迢遞  
隱屏前間尋五曲樵溪上三十六峰秋滿船甚有風調  
按諡法通考鎮成邵武人至正間諡貞文處士

唐王保定撫言足本凡十五卷宋嘉定中柯山鄭昉刻  
於宜春竹垞有寫本予戊辰辛未於京師兩借觀今會  
稽商氏刻僅什之一耳商刻稗海多得之浙東鈕石溪  
家



張伯雨句曲外史集外詩一卷中有魏國趙夫人管君  
挽詩落句云千秋鄉中名不沒墓有通兒書老銀自注  
歐陽率更子通自書母夫人銘夫人諱老銀

伯雨有鵲華秋色圖詩序曰吳興公自序云公謹父齊  
人也余通守齊州罷官來歸為公謹說齊之山川獨華

不注最知名見於左氏而其狀又峻削特立有足奇者

為作此圖其東

當作西

則鵲山也命之曰鵲華秋色云張

雨賦詩於左弁陽老人公謹父周之孫子猶懷土南來

寄食弁山陽夢作齊東野人語濟南別駕平原君為貌  
家山入囊楮鵲華秋色翠可餐耕稼漁陶在其下吳儂  
白頭不歸去不如掩卷聽春雨此吾郡故實故錄之公  
謹名密著書數種齊東野語其一也

吾邱衍學古編小冊秀水項藥師家寫本首有危素夏  
溥二序泰定甲子安處道人跋又陸文裕深題後云元  
人書法有復古之功吾邱子行尤長篆籀圖印之學今  
京師所刻學古編不工間為校定數字稍加次第以便

考觀云

宋事實類苑四十卷祖宗聖訓第一至第五

神宗止

君臣

知遇第六至第七名臣事跡第八至第十二德量知識  
第十三至十四顧問奏對第十五忠言讜論第十六至  
十七典禮樂律第十八至二十官政治績第二十一至  
二十三衣冠盛事第二十四官職儀制第二十五至二  
十八詞翰書籍第二十九至三十一典故沿革第三十  
二至三十三詩賦歌詠第三十四至第四十文章四六

第四十一至四十二曠達隱逸第四十三至四十四仙  
釋僧道第四十五至四十六休祥夢兆第四十七至四  
十九占相醫藥第五十至五十一書畫伎藝第五十二  
至五十四忠孝節義第五十五至五十六將帥才略第  
五十七至五十八知人屬舉第五十九廣知博識第六  
十至六十一風俗雜誌第六十二至六十三左朝請大  
夫權廢遣吉州軍州事江少虞撰有自序題紹興十五  
年五月十七日此書蓋合宋人載錄傳記數十家薈萃

成之自云聖謨神訓朝事典物與夫勲名賢達前言往  
行藝術仙釋神怪之事外國風俗之殊纖悉備具宋人  
說部之弘備而有裨於史者門人庶吉士楊中訥言黃  
太沖宗義家所有宋人說部可作史料者凡三百餘種  
又常令門生輩取漢唐宋元以來諸儒經解刪其煩複  
著其異同將勒成一書經始春秋祇春王正月一句已  
盈五大帙度不可成遂罷去

宋江西洪亶郎中妻文城縣君李公擇尚書姊也治春

秋博學能文作公擇挽詩云久歷金門貴未酬黃屋知  
如聞天祿客抱恨作銘詩不減前人載江少虞類苑黃  
山谷公擇甥也有題姨母畫竹絕句云白頭腕中萬斛  
力或即文城耳

孫文定公

廷作銓

世祖皇帝挽詩云周京衅甲將歸馬漢時逢春自射牛  
時以為工予讀張文潛集論裴守真云守真為太常博士  
論射牲禮曰古者天子自射牲漢遣侍中今天子奠玉

酌獻而已可也古今異宜不必射牲夫射牲古也古也  
勞而今也佚則從今立觀舞今也今也勞而古也佚則  
從古守真非真能法古也特從其佚使人主便之而已  
按禮祭之日王祖牽牲及詔於庭而麗於碑則王射之  
國語曰禘郊之事天子必自射其牲諸侯殺牲之禮與  
天子同大夫士視殺事之而不親卑者之事也

李刑部言遵義府多虎有四種斑虎與常虎文質同黃  
毛虎無黑文尤獍惡蓑衣虎毛長被體如蓑衣狀刀箭

不能入而朱虎最獍嘗于綏陽村落間二日齧三十七人捕之則咆然入山卒不能致其毛殷紅如猩猩羶色章邱胡武舉隨其兄任真安州州遵義屬也云鹿亦有三四種最大者曰水鹿狀如水牛重五百斤李又云遵義有山水豹皮有斑文自然成山水形宛如圖畫

同年王階胎仙景州人有道術知湖州府有虎食人以符咒致虎于公堂杖殺之弁山每稻熟嘗有雲霧居人輒見霧中有人若負擔者什伯為羣霧散則稻穗已空



矣王命結壇山上令道士吳梅岑者代已禮拜而自具  
衣冠書符籙忽顧吳曰大風且至但勿動須臾果大風  
發屋拔木壇上人皆惴恐已而風息自是雲霧不作歲  
獲豐稔宗伯吳廬澤宏聞之吳云

鄺露赤雅云南方火浣布有三種畢方麻者一端數金  
祝融木者一端百金火鼠毛者一端千金凡卉服績其  
皮者有勾芒布紅蕉布績其花者有桐花布瓊枝布娑

羅布吉貝布桃花布

南中千葉桃花似牡丹穗長尺許織穗成布勝於火浣又鳥

毳之精織成文章者曰鎖袂其粗者市於矜獐曰鷺屬  
錦有鷺頭花藥簇蝶龍油龍油錦以蛇膏澤之入水不濡  
兩粵山中有大蝸殼可容升者以米水去涎竹刀膾之  
角大如指甘脆云解積毒

猺髻有芙蓉望仙懷人雙龍孤鳳濃春散夏懊儂萬疊  
愁急就妝其下者曰盤蛇曰垂鞭曰鹿角或目為丁妝  
鼻夷獠族鼻如垂鈎以猿臂鯉骨為笛吹之作龍吟與  
之酒鼻飲輒盡

木客形如小兒在恭城見之衣服不異人自云秦時造  
阿房宮采木流寓於此嘗見其賦細雨詩云劍閣鈴逾  
動長門燭更深又云何處殘春夜和花落故宮此廊露  
湛若所云恐因坡老木客解吟詩之句而附會之耳

崇山有驩兜故宮四十里即至越裳

南方溪澗謂之究如金山郎究越裳究南陵究文狼究  
金雞究之屬

博白縣山村號曰綠含其山多鳳皇有高三尺者備五

采冠似金杯常棲高樹之巔又有大如鷺者尾甚長羽  
聲如轉輪名大頭鳳或為猺獐所射緝毛為裘涅而不  
滓兩江溪洞中出鳴鳳形如孔雀頭上有彩毫光如掣  
電冠上垂二弱骨長一尺五寸其鳴叶宮商猺女握兵  
符者衣鳳裘蝶綃裘即綠含鳳毛所緝蝶綃冰蠶所織  
也

邕州產鳩有二種一大如鴉黑身赤目一大如鴉毛紫  
綠色頸長七八寸雄曰連目雌曰陰諧聲如羯鼓鷓鴣羽

櫟酒犀角立解故鵠穴多犀

鷦鷯似鵬而散尾聲甚哀亦名鬼車帝嘗書曰逆鷽爾  
雅曰鷽糜鷽啼血如杜鵑儒書奇鷽十首周公命庭氏  
射之血其一首今餘其九夫子子夏見而歌之曰鷽兮  
鷽兮逆毛衰兮一身九尾長兮予在鬼門見者正一身  
九尾其九首者雄鷽猶九首曰雄虺也

王母似練崔青色長尾尾有錢如孔翠猺中有王母裘  
山都形如崑崙青毛有尾見人輒閉目張口好笑好在

深澗中翻石覓蟹噉之

熊有綠者猛獍取為鄣泥塵不敢揚威懾虎豹樂府云  
郎眠綠熊席又溫柔藉綠熊

懶婦狀如豪豬而小好食黍以機杼織絰挂於田中則  
望之却走齒長入海化為巨魚名奔鯨取以煎油其膏  
百斛澆蠟作燭取以飲酒則明讀書則暗

獬生銅坑中食銅鐵鍊糞為兵可以切玉接溺為水可  
以銷鐵有十首者名曰獬白居易獬屏贊序曰寢其皮

辟溫圖其形辟邪

肉翅虎出石抱山晨伏宵出比虎差小翅如蝙蝠身如虎文飛而食人其皮可辟鬼物

象似犀而角小知吉凶耳大如掌目常含笑生於兩鼻東曰茅犀西曰豬神遇之則吉

藤江有鯖魚大者餘百斤其膽治目功比空青魚大膽小者上魚大膽大者中上魚小膽大者中下漁者得魚官稅其膽始敢市其偽者以鮓膽灌黃藤膏為之鄺詩

云金環殉吉鵠花縣稅鯖魚

白妾魚一名婢妾臉如芙蓉膚如凝脂有天然肉結長四尺五寸臍下有帶白光映人作膾香脆水陸無方者印魚方額有印文似竹葉符鳴如鐘

海蠻師虎頭無鱗身有豹文長八九尺見人泣數行下蛋人網得輒放之

忽雷鯉魚也用其齒骨作樂器有異響經曰河有怪魚厥名曰鯉其身已朽其齒三作



斑衣山子散居橫州震龍六磨諸山無版籍定居夫婦  
交媾插青路衢以斷行旅銜弩獸交媾精入地是生短  
狐短狐人所生也詩曰蜮書射工騷曰短狐狐長三寸  
狀如黃熊口銜毒弩巧伺人影南海有蟲亦名水弩亦  
能射人以四月一日上弩八月一日卸弩與此不同射  
工之毒惟蟾能解之

赤蟻若象渾身帶火力負萬鈞雜食虎豹虺蛇遺卵如斗  
人取為醬是名蜆醢

蚺蛇長九十丈者吞蟻六十丈者吞象三十丈者吞虎  
豹凡蛇盤處必在壬地

獠人社日以南天燭染飯競相餽遺曰青精飯

泗城州土司有雄黃搗衣砧光可以鑑

治瘴法宜溫中固下升降陰陽及灸中腕氣海三里  
或灸大指及第五指皆能止熱若用大柴胡湯及麻黃  
金沸草散青龍湯膠柱鼓瑟尠不敗矣又中瘴失語俗  
為中草子移時血凝立死法當用鍼刺頭額及上唇仍

以楮葉擦其舌令血出徐以藥解其內熱立效

卯卜者握卵祝之書墨於殼記其四維煮截視當墨處  
辨殼中厚薄定吉凶撞人卜葬請雞匠祝之以卵投地  
不破者吉

馬伏波銅柱一在憑祥州思明府南界一在欽州分茅  
嶺交址東界又於林邑北岸立三銅柱為海界林邑南  
立五銅柱為山界唐馬總為安南都護立銅柱二於漢  
故地五代馬希範平蠻立銅柱二於溪州自漢已來立

銅柱者凡三皆馬氏

右二十九則皆出鄺露赤雅錄之以廣見聞露字湛若南海人工詩

名嶠雅

予觀楊文貞公所進文淵閣書目經解錄毛詩於卷以備訪云

詩傳 毛詩 童子問 朱氏傳 鄭氏箋 注疏

正義 要義 鮮于傳 錢氏傳 文公傳 李樗詳

解 總聞 嚴氏解 即詩緝 補傳 詩傳通釋 呂

氏讀詩紀 詩學備忘 毛詩詁訓 指說 毛詩音

訓 穎濱傳 歐陽本義 詩纂圖 詩傳遺說 楊  
慈湖傳 詩傳附錄纂疏 詩釋文 詩音義 放翁  
詩說 詩講義 李黃詩傳 詩傳旁通 名物鈔  
鳥獸草木蟲魚疏 詩疑大鳴錄 圖說 辨疑 疑  
問 解頤 斷法 詩義指南 詩義矜式 梁寅詩  
考

內府所藏止此亦鮮祕本

文淵閣書目唐人文集出於聞見之外者亦鮮併識於此

張說 王維 韓愈 元結 李翱 柳宗元 呂溫

杜牧 皮日休 駱賓王 獨孤及 陸贄

歐陽詹 顏真卿 司空圖 許渾 李絳 劉長卿

劉禹錫 白居易 權德輿 陳子昂 李商隱

李觀 張九齡 沈佺期 皇甫湜 松陵集 沈亞

之 李德裕 元稹 黃滔 誤次宋人 杜甫 李白 韋

應物 孟郊 竇氏聯珠 李賀 鄭谷 姚合 王

建 李益 杜荀鶴 桃山集 未知名氏 羅隱 孟浩然

張祜 錢起 孫樵 岑參 高適 溫庭筠 方干

陸龜蒙 張籍 王績 儲光義 鮑溶 李嘉祐

漢上題襟集 河岳英靈集 歲時雜詠 麗澤集

蕙畝拾英 中興間氣集 唐賢詩集 唐百家詩

三體 鼓吹 唐音

長山李某知石首縣將之任予屬訪楊文定公後人并  
其祠祀及文集頃有書至云已重修公祠堂錄祠中洪  
熙元年碑敕一通遺文五首詩九首文定五世孫元音

所撰公生平行事大槩記一篇鈔錄者九世孫先駿先  
恒也名臣之裔零落如此為之三歎按文定公文集十  
二卷見國史經籍志今文貞東里集文敏兩京類豪皆  
傳於世而文定集獨湮沒亦可慨也

李侍讀漁村

澄中

典雲南庚午鄉試著滇程日紀又云滇

中鳥有靈鷲形如鷺好集松上點蒼雞足多有之金線  
鳥大如雅青色背有金線文如錦繡人罕見之錦雞有  
全身如雪尾帶黑斑者土人呼曰竹鷺又有青色朱頂



者或赤色頭有綠角遍身珍珠點者多在深山竹林中  
五色俱備

又云點蒼山之巔有石屋登者入其中輒忘饑渴

變彛近水居能變牛馬猫犬鷹雀等形夜入人家又有  
栗蘇以捕禽獸為業多百餘歲者死輒化為虎豹熊羆  
毛人諸物此二種與月山叢談所述大同小異毛人亦  
曰山魃形與人似徧身長毛見人則執手而笑竟日方  
醒醒則食人每笑則脣上掩目獨畏爆竹按此物名𧈧

萬萬萬臯羊也人遇之以竹筒置臂姑與之握俟其笑  
曲臂以鑿綴其脣於額格殺之故吳都賦云猩猩啼而  
就擒萬萬笑而被格

宋葛立方常之歸愚集十卷

詩四卷樂府一卷騷賦雜  
文一卷外制二卷表啓二

卷諡文康勝仲之子諡文定邨之父也國史經籍志作

二十卷文定公南渡賢相有文集二百卷詞業五十卷  
不知傳於世否

費著撰蜀杜氏族譜云杜翊世以死節顯其世祖甫來

蜀依嚴武家青城者實宗文裔世孫準皇祐五年第進士宰綿竹以卒子翊世徙成都紹聖元年第進士官至朝議大夫通判懷德軍靖康元年死節特贈正議大夫命官其後十人五子慥忱以賞得官孫逸老俊老廷老曾孫光祖大臨以忠義遺澤得官今猶稱忠義杜云著此說不知何據坡詩有云聞道華陽版籍中至今尚有城南杜則子美有後於蜀其信然耶

工部左侍郎徐廷璽罷以都察院左副都御史李元振

為工部侍郎通政使司通政使徐潮為都察院左副都御史光祿寺卿羅秉倫為通政使

二月十九日未刻

文華殿經筵講官滿洲禮部尚書顧八代工部尚書索諾和禮部左侍郎席爾達右侍郎多奇刑部左侍郎傅臘塔漢吏部尚書李天馥刑部尚書陳廷敬工部尚書李振裕吏部右侍郎兼翰林學士彭孫通兵部督捕右侍郎王士禎翰林院掌院學士兼禮部侍郎張英侍戶部

尚書庫勒納禮部尚書熊賜履以

欽差往濟南兵部尚書杜臻以耳病不與尚書陳廷敬  
侍郎席爾達講中庸天地之道一節侍郎傅臘塔學士  
張英講尚書皋陶謨日宣三德四句講畢

賜宴太和門謝

恩而退

二十一日內閣傳

諭問故吏部尚書蘇赫品行宦業九卿對曰明敏決斷

遂覆

旨無謚

竹垞言文淵閣書目不識卷數萬歷中東粵人張萱官中書舍人別為內閣藏書目錄甚詳又涿州高儒者武弁也家多藏書有百川書目尤詳按萱歸善人仕終平越府知府嘗撰西園聞見錄一百二十卷又西省識小錄西園彙史各若干卷

章邱縣北一里女郎山有宋隱士穆賓廷秀墓洛陽王

壽卿魯翁題墓表篆書黃魯直有贊刻於碑額明萬厯間大名董復亨為令移置文昌祠稱二絕按魯翁祖擇之外孫工篆隸嘗召至京師使篆字說辭以與王氏學異以布衣終陸友研北雜志言家有魯翁篆閒居賦筆力如紐金屈鐵

樓玫媿答杜仲高書曰杜留花門連雲屯左輔百里見積雪以趙次公之詳且博略不注釋蓋花門即回鶻嘗考回鶻之俗衣冠皆白故連屯左輔百里如積雪然又

嘗與蜀士黃文叔裳食花稗因問蜀有此乎黃曰此物甚多正出閬州杜詩黃知橘柚來誤矣嘗至蒼溪順流而下兩岸黃色照耀直似橘柚其實乃此稗耳有好事者欲為子美解嘲於其處大非橘柚終以非其土宜無一活者此二條頗新異可喜

晁說之以道嵩山集有儒言一卷為荆舒作也記錄數則於此春秋云儒者必本諸六藝而六藝之志在春秋苟舍春秋而論六藝亦已末矣紛然雜於釋老申韓而



不知其弊者不學春秋之過也此因王安石廢春秋而發俗學云學者同尊孔氏法詩書躬仁義俗學之目何自而得哉建隆已來禮樂文明煥然大備皆諸儒之力也誰當其目也耶如惡其衆而欲致獨則比屋可封之民為罪人歟又或厭其久而欲新之則日月之出特久矣後漢治古學者貴文章以章句之徒為俗儒則斥俗學者身自謂耶此因王氏學而發漢儒云典籍之存詁訓之傳皆漢儒之力漢儒於學者何負而例貶之歟後

生殆不知漢儒姓名有書幾種而惡斥如讐漢儒真不幸哉昔人歎廢興由於好惡盛衰繫之辯訥良有以也公議云凡變律亂常則不當乎人心雖百人之譽不能當一人之毀蓋不待高識博達之士乃知其非雖塗人故自有白黑矣譽之者一時之偽而毀之者天下之公也昔公孫祿斥王莽國師秀顛倒五經毀師法令學士疑宜誅以慰天下侯景陳梁武帝十失一曰敷演六經排擯前儒王莽之法也當彼時猶有是言則公議不

可泯云彼乘勢怙力以肆其說者果誰欺哉的云溫公  
曰經猶的也一人射之不若衆人射之其中者多也嗚  
呼此公天下之言待天下忠且敬也顧肯申己而屈人  
必人之從己哉彼排擯前儒顛倒五經者宜媿諸此謂  
安石排擯韓富文司馬諸公之異己者同異云董仲舒  
曰詩無達詁易無達言春秋無達辭范甯曰經同而傳  
異者甚衆此吾徒所以不及古人也嗚呼古人之善學  
如此今一字詁訓嚴不可易一說所及詩書無辨若五

經同意三代同時何其固耶此指安石字說害教云害辭未至於害義害義未至於害教害教則三綱五常絕矣謂天不足畏百姓或可咈之類其害教奈何此條直述安石對神宗天變不足畏人言不足恤云云尤明鹿馬云因一鹿指以為一馬者一時跋扈之言也如因先王之格言而顛倒破壞者以天下為鹿而縱指之也不亦甚乎此刺安石借周禮以文其奸欺大言云袁紹與曹操論天下形勢操知袁氏世有河北未易圖欲捨而

他之則示弱乃出大言曰任天下之智力以道御之無所不可是豈操之誠心哉今談經者不覈其實喜為高論大言一切取勝皆操之下塵歟知本云言書者不取正於古文言詩者既恥言毛氏而又不知齊魯韓三家之辨果以詩為何詩耶言周禮者真以為周公致太平之書而不知有六國之陰謀地不足於封民不足於役農不足於賦有司不足於祭將誰欺耶春秋孝經則絕而不言未為知本慕古云善哉鄭康成之言曰既知今

亦當知古蓋今古交相為質則取道不遠或為高絕不可跂及之論曰在古當然不知古之道亦何利於今而必尚之耶王莽好空言慕古法今猶其遺風耶此數條皆指安石廢春秋假周禮南北之學云南方之學異乎北方之學大抵出於晉魏分據之後其在隋唐間猶云爾者不惟其地而惟其人也蓋南方北方之強與夫商人齊人之音其來遠矣今亦不可誣也師先儒者北方之學也主新說者南方之學也此刺王氏之徒先王云

姜至之先生謂商周之所稱先王者近自其祖宗而遠  
及異代之君也如舍祖宗而必在昔之法則亦悖矣此  
直糾安石言祖宗不足法之非傳勢云張禹專帝與太  
后之寵所謂張侯論者迺盛於天下崔浩威福震宇內  
其五經之注學者尚之至勒為石經逮禹死浩誅之後  
無一人稱道其說者則前之所傳者非經也勢也此以  
禹浩著作擬安石名聖云荀卿之弟子與叔孫通之弟  
子皆以其師為聖人至於何曾之孫又以其祖為聖人

聖人之名亦可私得乎卿之弟子學無所成通之弟子  
因賜金之利曾之孫歎世事之驗於是乎云爾使其成  
學而不外慕則俊造之名尚未易許人矣祀聖云爾朱  
榮晉公護無君大惡既死廟而祀之以配聖人范陽間  
祀安史為二聖嗟夫人文悖而不已則鬼享僭而不法  
可不戒哉此二條指蔡卞輩以安石配享孔子其餘尚  
多予曰此王安石爰書也儒言云乎哉

金蘭集三卷元蘇人徐達左良夫輯其友朋贈答之詩



主行止仲序之良夫居光福山中自號耕漁子高巽志  
為作軒記楊基孟載為之說武功伯徐瑄為之傳俱附  
見集中元求如周伯琦高啓鄭元祐倪瓚張雨仇機沙  
諸名勝皆在不減金粟道人玉山雅集

隆平集二十卷曾子固撰紹興十二年淄國趙伯衡序  
云子固為左史日嘗撰隆平集以進自太祖至於英宗  
凡一百六年為書二十卷當時號為審訂頒付史館副  
存於家卷首有大德少陽印楊士奇印梅花閣書畫印

蓋楊文貞公故書得之元內府者

叢桂毛詩集解三十卷宋朝奉郎段昌武撰大旨本之  
東萊詩記叅以晦菴詩傳卷首有行在國子監權尚書  
禮部侍郎兼祭酒兼同修國史實錄院同修撰兼侍講  
徐押行丞程押淳祐八年七月給貢士羅樾公據

居易錄卷十六

欽定四庫全書

居易錄卷十七

刑部尚書王士禎撰

陸友記天下湯泉知名者七匡廬汝水尉氏驪山鳳翔之駱谷和州之惠濟渝州陳氏山居又云燕之昌平亦有溫泉而不及遵化之石門李太僕日華云溫泉有三種朱砂者水光赤疏黃者有疏氣乳石則流白而無氣黃山朱砂汝上疏黃石門鍾乳也溫泉與

孝陵密邇康熙二十年

車駕謁

陵非

命宰臣李霽以下往觀皆賦詩刻石泉上

袁桷云大篆不得入小篆隸書最忌入八分今世俗乃以八分為隸何其不察耶

研北雜志云韓侂冑閱古堂圖書皆出向若水鑒定此亦賈似道之廖瑩中

鐔津集十五卷宋僧契嵩著嵩有非韓三十篇在集中

其詩亦多秀句如習忍如幽草觀身類片雲桑柘雨中  
綠人烟闕外疎天岸日將出田家雞更啼好山沿岸去  
驟雨落花來雲迷飛鳥道雨出古龍湫明月出已滿白  
雲歸未多皆佳夢梁錄云姓李字仲靈嘉祐中進輔教  
編賜號明教禪師林間錄嵩明教初至開先主者命掌  
書記笑曰我豈為汝一杯薑杏湯耶乃去之西湖坡公  
所云契嵩禪師多嗔人未嘗見其笑者是也

林外野言二卷元崑山郭翼所著詩翼字熙仲與楊廉

夫顧阿瑛倡和風氣亦頗相類

張說西岳碑云西岳太華山者當少陰用事萬物生華  
故曰華山如此則與吾濟華不注山同音義故華山有  
平去二讀

張萱內閣藏書目錄詳載卷數及撰人姓氏其書視文  
淵閣目所載則缺失多矣累朝亦間有增益者因並錄  
毛詩疏解諸目於此

毛詩注疏 毛詩要義二十卷

長孫無忌等  
永徽四年上

詩總聞

二十卷

王質東平人有  
雪山集四十卷

詩緝三十六卷

嚴

毛詩指說

成伯  
瑜

萬厯間存本止此文淵書目所有又多不可詰矣

宋嘉定間著作郎曾從龍請嚴臣僚借書之禁紹定三年三月詔祕書省書籍非係省官毋得借書許從監少置簿有欲關文籍為檢閱較正等用即先批簿以憑請取俟還本庫隨與點收或借出已久亦須檢舉以察隱遺從祕書監葉禾言也蓋古今通弊如此

內閣藏書目錄載林光朝謙之父軒集二十三卷

闕第三  
第四第

二十一第  
二十三卷

陳藻元潔網山集八卷林亦之學可樂軒集

十六卷

闕第  
八卷

劉攽貢父彭城文集十四冊有

三劉文

集

中允渙祕丞  
恕檢討義仲

三孔清江文集四十卷

孔文仲武  
仲平仲

南

陽集三十卷

韓維

劉忠肅集

摯

盤洲集八十卷

洪适竹  
垞鈔本

止有  
詩

野處前後集九冊無卷數

邁

鬲山集

朱翌

元清

河集三十九卷

有闕元  
明善

元遺山集四十卷

元好  
問

豫章

集二十四卷

熊朋  
來

滋溪集三十卷

蘓天  
爵

牧菴文五十

卷

姚燧

右宋元數公文集曾觀其本而卷數未合者錄記



再訪若原貢二劉先生公是公非集內府亦闕如可歎也

國史樂律志四卷南充陳文憲公于為史官時撰文憲

在內閣請開史館未幾去位館亦罷惟此志及葉文忠

公臺山四裔志焦修撰澹園經籍志僅存

中興館閣續錄載南渡祕閣所藏徽宗御題畫三十一

軸八軸有詩皆絕句擇其近雅者錄於此杏花鸚鵡並

亞隴雲飛穩巢文杏枝高棲良自得蜂蝶莫相疑桃竹

黃鶯出谷傳聲美遷喬立志高故教桃竹映不使近蓬

萬

已上七軸有宣和殿御製並書七字

趙昌江梅山茶趙昌下筆摘韶光

一軸黃金滿斛量借我圭田三百畝真須買取作花王

又御書趙昌

奇筆四字

圖畫一百八十七軸御府續行降付併舊藏九百十一

軸嘉定三年六月并用都堂印仍於畫背用祕書省印

御前書經史子集二千五百二卷四庫書二萬三千

五百八十三卷續搜訪庫書二萬三千一百四十五卷

諸州印板書六千九百八卷名賢墨蹟一百二十六

軸一冊續行降付八十九軸 古器四百十八件續降

八十三件 硯七十五琴七石宋中興館閣錄所載

竹垞輯宋人小集四十餘種自前卷所列江湖詩外如

劉翼躔父心游摘橐問道論詩也一宗燒柴煨芋佛家

風要知真樂人間少聽雨空山破寺中

山寺聽雨

林希逸厲

齋十一橐寬心可要流香酒圓夢何須正焙茶

入局

明皇

按笛達磨渡蘆二圖長歌皆佳又六言蚯蚓兩頭是性

桃花一見不疑了得葛藤三昧却叅茱萸諸詩

厲齋為林父軒

理學嫡派而詩多宗  
門語肅齋有全集

教陶孫器之臞翁集古詩歌行頗

有盛時江西風氣其詩評尤為談藝家所推引朱繼芳

李實靜佳集屈指秋風與雁期陽關西去到何時側身

一望腸堪斷天似穹廬碧四垂客路不踏長安十二門鷗

鷗飛處數家村停棹試向灘頭問可是嚴光末世孫漁父

緩行松葉滑小摘藥苗稀招隱大江流禹蹟老樹見秦時

登眺魚唼垂絲柳鷗眠折葉菱湖蕩青天浮渤澥白日走崑

崙對酒駉客五花唐殿馬主家七葉漢宮貂謝野水郎君名飲金

陵王氣水東流流到淮南古岸頭夜半一聲天上曲錦

帆天子下揚州

揚州

相逢已恨十年遲買酒吳山

關

詩明

日送春仍送客柳花風颺鬢絲絲

題李秋堂詩卷

老眼看花興未厭

不知頭上雨簾纖流鶯浪語春風恨誰拘花枝插帽簷

遊甘園

我登滄浪亭復歌滄浪曲歌竟復長歌杳杳山水

綠天風吹散髮山月照濯足為謝獨醒人魚家酒初熟

滄浪風月

林尚志潤叟端隱橐江亭飲罷起離愁何事西風

又越遊潮信欲來人欲去夕陽紅蓼滿汀洲

適越留別

杜宇

一聲詩思減楊花三月客愁多

春日

留客醉終日愛花吟

過春

贈許綏

陳必復无咎山居棠冷烟寒食月小雨浴蠶

天

百五節

一夜簷花雨十年江樹春

贈張駒

蘆蓼作秋意汀

洲生晚寒

舟行

人家半在桑柘佳春水忽迷蘆荻叢

舟中微東

坡

劉過改之龍洲集叫囂排突純是子路冠雄鷄佩玃豚

氣象風雅掃地劉仙倫叔擬招山集頗乏警秀七言山

僧幾輩雪垂領水鳥數聲雲滿谿

西林

黃文雷希聲看雲

集差有骨力長句西域圖昭君曲甚佳又獄吏但能書

牘背相君終欲割鴻濛

東林拜岳王遺像

黃大受德容露香拾

橐虎穴山川險蛟涎草木腥

白水祭

武衍朝宗藏拙橐

絕句多佳作如牡丹春藥正穠華有旨今年不賞花剪

落金盤三百朶內批分賜近臣家

宮詞補遺

桂華珠殿水精

樓柘袖籠香乙夜遊飛下銀橋人不覺月明三十六宮

秋

開元廣寒詞

靈和殿裏最風流三月飛花滿御樓換得玉

人着樣巧一春渾不下簾鉤

柳枝

飛鷁鳴鑼鼓吹喧繁華

應勝渡江前吟梅處士今還在肯住孤山爾許年

湖上寶

髻無光玉貌昏銜悲空感舊承恩君王愛問先朝事時

許車兒到殿門侍輦看花上苑春太皇宣索鳳笙頻如

今猶記當時曲對譜閒教小內人

老宮人

鈿車輕轆轤芳

塵步郵香移一片春花下玉盤行禁臠御前宣勸到湖

濱

貴遊

疊疊滄波隔亂山白鷗飛去復飛還吟邊好思無

多子只在孤鴻落照間

吳江水月塔院

粉靨嬌春掌上輕玉琴

聲裏見深情花邊欲別重回首猶恐絲絃說未明

阮客碧



雲千嶂合紅樹九秋深

松陵晚泊

寒食梨花月新晴楊柳風

愁消山色裏興極酒杯中綠髮日夜變青春今古同忍

教行樂地容易夕陽紅

飲湖亭

張蘊仁溥斗野集春風酒

棹湖堤柳晚月吟鸛輦路花

春朝偶題

雲生不沒仙人跡丹

化猶啼搗藥禽

大滌洞天

丹青嶺樹明寒葉水墨江天噪亂

鴉

東菴

連山黃獨雪一雁白蘋風

雪川

暑退涼生體氣佳捲

簾聽雨感年華西風葉葉梧桐冷開遍庭前白鶴花

秋思

憶著前遊十四年三高祠下夕陽船無錢買得鱸魚鱠

吟就橘花香裏眠

虹垂

劉翰武子小山集淒涼池館欲棲

鴉彩筆無心賦落霞怡悵後庭風味薄自鉏明月種梅

花

種梅

送客歸來月滿簷梅花微笑隔疎簾酒醒今夜銀

屏冷沉水薰爐旋旋添

客去

長句鴻門宴玉斗歌吳門行

皆佳張良臣武子雪牕集叢叢竹雀鬧人家農事春來

漸有涯品字柴頭恨正暖不知風雪到梅花

示長蘆仁禪師

白

鷺悠悠去不還渚雲汀草一生閒暮年不入西州路空

倚梅花說住山

吳興投老卷

三十六陂春水綠四十九年人

事非揚子江頭永嘉後吳儂蕩漿北人稀

感

忙帖平湖

印晚天踏歌遊女臂相牽鳳城半掩人爭路猶有胡琴

落後船

西湖晚

趙希樞誼父抱拙集市井蕭條景物非居

人猶號永和隄春山十里斜陽樹漠漠殘紅杜宇啼

過

平利登履道陂橐擁巖千修篁中有寒泉飛

遊佛

何應

龍子翔橘潭橐樓上佳人唱渭城樓前楊柳綰離情一

聲未是難聽處最是難聽第四聲

有

沈說惟肖庸齋集

海明看出日山晚倦行春

寄慈溪何贊府

釋永頤山老雲泉集

手攜一束書秋風獨來此松深孤月明水冷芙蓉死時

看澗鼠來食我山茶子

西岑日暮

拒霜花落碧潭秋嬾向山

巔水際遊貪看夕陽烏桕樹白雲紅葉亂溪流

秋晚

獨聽

子規叫況逢山月明

冷泉亭

溪色乍涼雙鷺下雨聲纔絕

一蟬鳴

憶舊隱

薛嵎仲止雲泉集二十里松聲千山雪未

晴

太白觀雪

巖陰常候雨松色不知春

真隱寺

雪渡溪流澀廚

烟栢葉香

閒居

芳草思無際春風情最多

春晴

隨身惟一鉢

留偈別雙松

松風隆首座

離家買湖石開印對中山

送台州倅

湖

水涵秋霽風荷動夕陽

漁舍

俞桂希却漁隱索西風蕭瑟

入船牕送客離愁酒滿缸好記此時分袂處暮烟微雨

過松江

松江送人

葛天民無懷集月趁潮頭上山隨柁尾行

大江中夜滿雙櫓半空鳴

訪端叔

一杯殘臘酒萬古夕陽

愁

雪後

寒食少逢天氣佳十日九日雨如麻新巢初見燕

生子小巷已無人賣花

即事

花枝照眼堂堂去茗椀關心

故故香

已下

塘六月闌心處西塞扁舟入手時

荷葉

姚

鏞希聲雪蓬集病起春風過閒居野草生

懷頤山老

風帆逆

水上江鶴背人飛

桐廬

王戴溪頭小隱仙漁翁引上雪溪

船幾回倦釣思歸去又為蘋花住一年

寓雪川

雨徑生新

草風牀受落花

賃居

踏雨來敲竹下門荷香清透紫綃裙

相逢未暇論奇字先向水邊看白雲

訪中洲

右諸人唯葛

天民及與楊誠齋相倡和劉改之亦前輩人餘多摹擬  
四靈家數小氣格卑風氣日下非復紹興乾道之舊無  
論東京盛時已可一慨也

宋牧仲中丞寄薛尚功古鐘鼎彝器款識二十卷陶南

村書史會要十卷皆厭原山人隱之王孫刊本會要第十卷為隱之所續明代善書人名款識雕版最精末有張天雨趙松雪楊伯巖周公謹柯丹邱周伯溫豐南禺鑒定題跋蓋從古本臨摹者極可寶玩

牧仲中丞寄豫章張吏部泰來扶長所撰江西詩派圖錄人各為傳其二十五人名氏次第遵王伯厚小學紺珠定本扶長云胡氏苕溪漁隱與山堂肆考有何顗無高荷又列洪朋於徐俯之後豫章志有高荷何顗無何

顓呂本中彼不在二十五人之中云予按劉克莊後村

江西詩派序云呂紫微作江西宗派自山谷而下凡二

十六人內三人袁顓潘仲達大觀有姓名而無詩詩存

者凡二十四家王直方詩少絕無可采云云其次第則

首山谷次后山韓子蒼徐師川潘邠老三洪龜父駒父玉父夏

均父二謝無逸幼槃二林子仁子來晁叔用汪信民李商老三僧

如璧即饒德操祖可善權高子勉江子之李希聲楊信祖呂紫微合

山谷為二十四人王立之無傳袁顓則與今本作何顓



迥異後村伯厚皆宋末人不知各何据依而異同如此  
張云梓於厭原山中者詩派一百三十七卷續派十三  
卷今其書不可得而見矣張傳頗詳博而於後村傳無  
所稱引蓋未覩後村全集耳張康熙庚戌進士

會稽釋子元璟字借山平湖人投詩為贄頗有秀句如  
相思若鷗鳥咫尺隔風烟鄰衲司吟卷門生致酒錢風  
曳鷺黃淺寒吹鴨綠平坐看春艤子吟到闔閭城清鐘  
來木末白鳥落風湍人家收柏子楓樹著霜花晚菰分

竹園秋水遠籬根烟中多翡翠花裏又鉤輶一笛破寒  
渚千帆湊夕陽懶呼猿引客閒許鹿叅禪試看青齒苔  
倒浸碧波瓊卜築精籃似淨名愛君三絕擅平生桑條  
綠滿門前徑客到幽禽啼數聲瘦策衝泥訪鐵厓銅坑小  
喫雨前茶無端攪亂春愁客屋角一枝山杏花玉削羣  
峯抱一村甘泉如乳出雲根負薪伐竹扶犁叟多是楊

家十葉孫

過楊鐵厓故里

崔文敏公後渠漫記云宋史濫矣誤國之臣亂真之儒

後猶有稱述之者道其不明矣夫王安石之變法其弟  
安國諫之不從乃哭於影堂曰吾家必滅門蓋知其必  
亡宋也一張浚出師與高宗克日復中原岳飛曰相公  
睡語耶遂忌岳陷之高宗謂趙鼎曰浚措置三年竭民  
力耗國用何嘗復尺寸之土朕寧亡國不用此人浚又  
上疏言兵高宗曰浚用兵天下皆知之富平淮西兩敗  
矣今又生事乃下永州之命史氏皆咎其君之不用浚  
也非實也

二實錄曰符離軍敗浚鼻息如雷果然是輕

民之命宜其敢用罔也

三

考亭於二人多恕詞予所未

喻特錄洵詞數條正之文敏理學大儒其言不阿如此

宣城梅孝廉淵公

清

別字瞿山以詩名江左畫山水入

妙品松入神品數年來罷公車輯梅氏詩畧十二卷始

唐梅遠次宋侍讀學士詢昌言都官員外郎堯臣聖俞

迄明守箕季豹禹祚禹金輩凡百有八人寄予請序又

寫黃山天都蓮花雲門諸峯光明頂文殊臺師子林煉

丹臺蒲團松西海門後海始信峯百丈雲梯湯池桃花

源白龍潭松谷凡十二幅脩極烟雲變幻之妙自題其  
首云漁洋山人居身東岱縱目南溟西已蜀北幽燕宇  
內大觀憑軒殆徧俯視一切直培塿耳憶十年前曾汎  
黃海之勝索予作圖久而未報康熙壬申正月春雪初  
晴拈毫灑墨偶爾成雲此則天都第一峯也又寄畫梅  
一卷烟雪歷落枝幹奇古似過王孟端海內文章之交大  
半凋謝惟瞿山歸然尚存其畫已貴重於世更數十年  
斷紉零素當不減燕黃也

宋人工於題跋海虞毛氏汲古閣列入津逮者不下十餘家予讀樓宣獻玫瑰集題跋多至十數卷往往可稽掌故而毛氏遺之

仁和吳檢討志伊

任臣

家有唐會典開元因革禮長洲陸

醫其清家有王象之輿地紀勝皆宋刻

杜氏編珠四卷隋著作佐郎兼散騎侍郎杜公瞻撰自序云隋皇在江都日好為雜詠及新體詩暨緣屬思顧謂侍讀學士曰且經籍浩汗予史恢博朕每煩閱覽欲

其故實簡者易為比諷爰命徵臣編錄得窺書圃故目之曰編珠其朱書者故實墨書者正義時大業七年正月奉敕撰勒成四卷謹序右內府寫本闕三四卷序稱煬帝曰隋皇不可曉其云在江都日者按史大業元年自長安至江都置離宮四十餘所秋八月行幸江都二年三月發江都四月至東京書蓋奉詔旨編於是時而稱大業七年何也隋世類書僅見此如初學記北堂書鈔之例但差簡耳所引多緯書如靈憲河圖括地象易緯

易通卦驗易飛候春秋說文元命包尚書中候師曠占  
孝經援神契春秋歷序風角之屬若任豫益州記鄭緝  
之東陽記徐先生南岳記庾仲雍荊州記羅含湘中記  
黃閔武陵川記王韶之始興記王孚安成記史筌武昌  
記桓氏臨汝記沈氏南越志盛弘之荊州記孔暉會稽  
記孔靈符會稽記石虎鄴中記伏琛齊地記三齊畧記  
雷次宗豫章記楊佺期洛陽記裴淵廣州記邱淵之征  
齊道里記張僧鑒潯陽記華延雋洛陽記辛氏三秦記



郭仲產泰州記荊州記山謙之南徐州記吳興記鄧德  
明南康記白袞晉國記習鑿齒襄陽耆舊記周景式廬  
山記紀義宣城記釋惠遠廬山記劉欣期交州記陸機  
洛陽記陶氏京都記謝靈運遊名山志郭緣生述征記  
續記伏滔北征記戴祚西征記宋永初山川古今記周  
處風土記徐道士履名山畧記諸宮名三輔舊事晉宮  
闕名洛陽宮殿名交州以南外國傳楊孚交州異物志  
南方記魏畧漢宮典職鄴宮殿觀閣名應劭漢宮名王

孫新昌書張璠漢記蒲元別傳晉安帝記王粲刀名蔡邕禮樂志語林又何宣城婦遊仙賦見王母於瑤臺之上云云右諸書今多不傳特錄其目公瞻涿人

夢梁錄二十卷不著名氏是宋亡後追記臨安盛時風物自郊廟宮殿下至百工雜戲之流皆具似東京夢華錄而文不雅馴

晁以道與三泉李奉議書云本朝王元之之後晏公晏公之後歐陽公歐陽之後東坡皆號一代龍門其門下

灑掃應對之士後為名公卿將相者不可勝數也

晁以道作蘓叔黨墓誌云先生帥定武謫知英州繼貶  
惠州遷儋耳漸徙康州永州邈乎萬死不測之險獨叔  
黨侍先生以往來於先生飲食服用凡生理晝夜寒暑  
之所須者一身百為而不知其難翁板則兒築之翁樵  
則兒薪之翁賦詩著書則兒更端起拜之為能湏臾樂  
乎先生者也其初至海上也為文一篇曰志隱效於先  
生前先生覽之曰吾可以安於島夷矣先生因欲自為

廣志隱以極窮通得喪之理嘗命叔黨作孔子弟子別傳則固有以處其子矣先生不至永州稍還仕版居陽羨不幸疾不起叔黨兄弟葬先生於汝州郟城縣之小峨眉山遂家潁昌偶從湖陰營水竹數畝名之曰小斜川自號為斜川居士時一至京師自得於醒醒而徜徉一世之外所遇者與談靡不傾盡造次大笑謔浪間節概存焉若世未嘗有小人也宣和五年十二月乙未以暴疾卒鎮陽行道中年五十有二悲夫諸葛孔明初不

得申所志而躬耕南陽卒亦崎嶇巴蜀幸而有子曰瞻  
可以肆所志而無邦家以容瞻則赴魏軍而死耳嵇叔  
夜之志氣尤異而曾不得一席以全其軀而子紹身血  
亦何益於邦家古之父子有如此忠孝兩全而可恨者  
天乎不壽吾叔黨於盛世一振發之耶叔父藥城公每  
稱其孝以訓宗族云云此文畧盡叔黨生平梗概惜有  
闕文節錄之

劉後村作江西詩派序不為王直方立之作傳牧仲中

丞頃寄張吏部扶長江西詩派圖錄補立之傳適讀晁以道嵩山集有立之墓銘蓋吏部亦未之見畧錄數條以備考證立之少樂從諸丈人行遊無他嗜好惟晝夜讀書手自傳錄凡大編數十時避荒窮海有先生居焉立之身不出京師而傳彼所賦歌詩獨早且多若只尺居而手授受也立之於人顧豈燥濕寒暑之異哉然非其所好雖以勢力美官誘致之莫肯自枉也常監懷州酒稅尋易冀州糴官僅數月投劾歸凡十五年處城隅

小園嘯傲自適命其園之堂曰賦歸亭曰頓有一時文  
士多為賦詩彭城陳無已卒於京師立之割田十頃以  
周其孤多此類者立之病中取其平生書畫古器散之  
四方朋友無遺慕義樂善如此此事蓋古人所未有也大  
觀三年三月日葵密縣立之病卧久口不能良言猶慷慨  
忠憤不少憊且曰我所作詩文他日无咎序之死則以  
道銘我所謂遊荒窮海有先生居焉者蓋東坡也

後村作江端本傳太畧但云子我弟也子我詩多而工

舍兄而取弟亦不可曉張不為端本傳缺其字而謂臨川

人予按晁以道江子和端禮墓誌云祖休復

即鄰

仁宗時

修起居注有重名父懋相朝散郎又壽昌縣君劉氏墓

誌曰夫人劉原父侍讀家女嫁為江鄰幾舍人之子婦

男三人長端禮次端友端本端友等一日白夫人曰幸

見聽敢有言夫人笑曰不欲從科舉乎是吾素已疑之

矣且汝凡力學能文屈於有司二十年常為予言有司

待士之禮薄而法益苛愧之終其身汝等尚少而能不



樂於此乎汝安之則吾何有故端友與弟端本遂優游  
於園城數畝之田人多高之又按子和誌云江氏自轅  
陽侯德為陳留園城人非臨川也端友字子我端本字  
子之

陸農師佃放翁之曾祖也受經安石為禮部侍郎持議  
多為安石隱諱山谷目為佞史予讀其所著埤雅說魚  
說木二篇元豐間經進御覽首一條云今相士謂曾公  
亮得龍之脊王安石得龍之睛夫姑布之言何關故實

況進御之書尤乖理體此之為佞不既多乎

三月十七日

上諭諭兵部甘肅提督孫思克久歷邊地熟諳機宜當  
秦省用兵之時素著勞績自簡任提督以來益殫謀猷  
實心幹濟惠愛洽於士卒威望警乎外彛特沛殊恩用  
昭寵獎着加太子少保給一拜他喇布勒哈番以示  
朕酬勞至意當王輔臣之叛秦隴震驚思克與靖逆侯  
張勇奮威將軍王進寶同心討賊戮力

王室會故大學士文襄公圖海大軍入關秋毫無犯  
王師屢戰屢捷賊所據惟平涼一城腹背受敵力屈糧  
匱束手請降河西三大將之功為多今文襄及靖逆奮  
威皆歿惟思克在而年亦老矣故

王言褒嘉如此功懋懋賞實無媿焉予昔作平涼凱歌  
其一云河西三將氣如虹百戰功名次上公

文襄進封公

詔下一時齊虎拜漢朝爭羨竇安豐此詩曾經

御覽云

三月十八日

萬壽節不受朝賀諸王內閣九卿三品以上皆赴

暢春苑四品以下官員仍集午門

唐撫言載任華上嚴大夫牋上京兆杜中丞書上庾中丞書辭京兆尹賈大夫書雜引辟陽侯朱建潘安仁孫秀嵇叔夜鍾會平原君變者等事其詞傲慢無禮至云禍患之機怨仇之府豈在利劍相擊拔戟相撞哉其亦在乎詞色相于拜揖耳又云君猶惜馬蹄不顧我況有

請美人頭者豈復得哉華有寄李杜長句各一篇語頗  
狂易觀此數書亦唐末李山甫姚巖傑之流江湖道士  
之狡猾者耳蓋天寶盛時已有此風不至唐末而然矣  
王銍默記云時人語曰王家兄弟小底不如大底謂安  
石安禮安國也予謂論人以道德不以爵位當易之云  
王家兄弟大底不如小底論世者或有取于予言

三月二十三日內閣傳問九卿故大學士馮溥品行宦  
業皆奏云品行端方服官敬慎遂覆

旨

上諭內閣云溥有耿介之氣

賜謚文毅

以總督河道靳輔年老

命原任工部左侍郎降補順天府府丞徐廷璽以本官  
往協理河道事務

萬厯間浮梁人吳十九者自號壺隱隱于陶甓詩書似  
趙承旨所製磁器妙極人巧嘗作卵幕杯瑩白可愛一

枚重纔半銖性不嗜利所居席門甕牖而已樊玉衡贈  
詩云宣窰薄甚永窰厚天下知名吳十九更有小詩清  
動人匡廬山下重回首李日華詩云為覓丹砂到市塵  
松聲雲影自壺天憑君點出流霞盞去汎蘭亭九曲泉  
宋牧仲中丞最好古銅玉陶器在江右予嘗寄訊訪吳  
所製不可得矣

東坡云西湖處士骨應槁只有此詩君壓倒按林詩疎  
影暗香一聯乃南唐江為詩止易竹字為疎桂字為暗

耳雖勝原句畢竟不免偷江東之誚如坡言逋生平竟無一詩矣然如沙泥行郭索雲木叫鉤輶畫巖松鼠靜春棧竹鷄深又詠梅雪後園林纔半樹水邊籬落忽橫枝皆不失佳句也

李君實璽召錄載汶上王尚書年七十致政一日置酒遍別親戚不知所往後二十餘年家人朝武當遇之石巖中泣拜求歸不可因求救公日記取吾言屈死莫告狀餓死莫作賊二語足矣公手築墳於南旺湖濱其地



隨水消長出沒按王公諱杲嘉靖中官戶部尚書謫戍  
雷州居肇慶之崧臺書院予以祭告南海過之端人猶  
能言其遺蹟云嘗見汶上縣志亦不言公仙去

蜀中石蟬花其說不同益部方物記云蟬之不蛻者至  
秋則花其頭長一二寸黃碧色治小兒瘰癧又能已瘡  
是昆蟲之屬化為草木也又一說石蟬花葉如菖蒲紫  
萼五出與蟬甚類蜀人因以名之白者號玉蟬花宋景  
文贊曰取其肖象莫類於蟬是花以似蟬而名非真蟬

花也

文昌雜錄記太子太師張公昇大中祥符八年乙卯登

科熙寧九年丙辰終自初仕至薨謝歷一甲子先伯祖

太子太師贈太師大司馬公

諱象乾

隆慶庚午年二十四

登第崇禎庚午年八十四終亦歷一甲子約畧相似

秦吉了鳥名又龍生二卵一名吉了見北夢瑣言

居易錄卷十七

欽定四庫全書

子部

居易錄卷十八

詳校官侍讀臣陳崇本

員外郎臣牛稔文覆勘

總校官中書臣朱鈐

校對官中書臣方大川

謄錄監生臣范墉

欽定四庫全書

居易錄卷十八

刑部尚書王士禎撰

洪洞范部鼎彪西寄所著理學備考廣備考乞序范順  
治辛丑進士養親不仕隱居師曠故里講洛閩之學河  
汾間人士多從授經康熙戊午山西巡撫應

詔以博學宏詞薦不出奉

溫旨人益仰重之所著書凡數十種云

輝縣冀氏世傳楊忠愍公詔獄中畫梅一卷自題長歌

其上河南提學副使族兄書年

際有常見而和之

李閣學柵倚江言其世祖文定公

春芳

狀元及第明世廟

甚眷之超拜翰林學士同侍講嚴訥中允董份俱直西

內撰元賜一品服時六部尚書無一品服者一日候朝

午門外文定衣賜衣趨而入六卿於棕棚下望之色動

鄭端簡公曉口占絕句云翰林學士信堪誇新賜官袍

一品紗可惜六卿身上鶴一朝飛向別人家諸公皆大

笑絕倒

又言始祖李翁老農也居句容山中地名大村為縣人  
曹尚書義家佃種會尚書擇葬地青烏家爭集其門江  
西一地師來獻圖云某壤最吉即大村地也尚書不甚  
信薄贈而遣之地師怏怏復往大村徘徊瞻眺自恨其  
言之不售已而風雪大作日已暮無託宿處翁適往田  
因延至其家饋以鷄黍地師深德之次日晨起見屋後  
有草舍半間雪壓將圯雙棺暴露問之翁曰吾父母也  
貧不能買兆域久而未葬地師曰窮途荷君高誼無以

為報此間曹尚書家有吉壤若葬之富貴可數百年科第不絕翁曰吾方為尚書家佃田安能有之地師曰但往哀乞無害也然葬畢當速去慮其追悔耳翁如其言往值尚書方據案作書泣拜以告尚書領之翁則出白布一幅求尚書押字又允之急歸以告地師喜曰君福人也為指其穴葬畢辭去翁往謝尚書即星夜攜妻孥荷擔渡江而北至興化居焉自是漸饒裕至曾孫遂狀元及第至宰相即文定公也嗣是累世簪笏不絕文定賜

瑩在儀真子孫歸葬句容大村者甚衆

李小有嘗云其族喬世臣嗣京少文胞兄弟也皆以文名其父即文定公之孫一日行龍潭山中夜夢神告曰明日賜汝墨二丸汝子功名盡在此墨藏之勿忽也既覺不喻其故明日憩道左神祠神像宛如夢中所見視神座下二墨在焉駭然再拜攜歸以賜喬嗣京二子繼成進士鄉會二試皆用此墨未盡也喬歷官兵部侍郎嗣京監察御史



六科都左右給事中給事中共二十四員康熙元年後  
裁去左右給事中十二員六科止留十二員改都給事  
中為掌印按水東日記公文承旨舊稱五府六部都察  
院六科給事中景泰中李顯為給事中強加都字則知  
去都字為復古制云

御門聽政冬春辰初三刻夏秋辰正三刻內閣部院官  
率以昧爽齊集午門次至中左門稍憩乃入候於  
乾清門外

駕出陞

御座六部都察院等衙門以次奏事如初一日首吏部  
則初二日首戶部周而後始若宗人府奏事則恒居部  
院之首三法司例居第三部院奏事畢然後臺省官奏  
事既畢然後內閣大學士學士至

御前承

旨翰詹

起居注官滿漢各一員輪直立西楹下

葉文莊公盛水東日記備紀省垣督撫時僚友姓氏籍貫  
先曾大父大司徒公歷仕錄亦然前輩敦友誼念故舊如  
此今人以薄為道用心如此者鮮矣予官京師三十年渚  
更數署受同人之益不少暇日追憶筆之簡冊亦欲使兒

孫輩知之耳

遷祭酒後掌院學士遷少詹事奉  
命祭告後掌詹詹事以未及共事不具載

禮部尚書沙公澄

順治丙戌進士  
蓬萊人

梁公清標

崇禎癸未進士真  
定人以兵書大拜

黃公機

順治丁亥進士錢塘人  
以吏書大拜謚文僖

郝公惟訥

順治丁亥進士霸州人終吏部尚書諡恭定

龔公鼎孳

崇禎甲戌進士合肥人諡端毅

禮部左右侍郎王公熙

順治丁亥進士宛平人以兵書大拜

黃公機

見上

董公安國

奉天人

田公種玉

順治乙未進士同年宛平人

曹公申吉

順治乙未進士同年安丘人終貴州巡撫

禮部主客郎中劉廣國

順治己丑進士潛江人終漢羌道僉事

南廷鉉

順治丙戌舉人渭南人終  
松茂道僉事予撰墓誌

禮部儀制郎中曹首望

功貢豐潤人終  
蘇州府知府

主事侯杲

順治己丑進士無  
錫人終刑部郎中

顏光敏

康熙丁未進士曲阜  
人終吏部考功郎中

戶部尚書郝公惟訥

見上

梁公清標

見上

戶部左右侍郎劉公鴻儒

順治丙戌進士遷  
安人終左都御史

嚴公正矩

崇禎癸未進  
士孝感人

田公逢吉

順治乙未進士同年  
高平人終浙江巡撫

魏公象樞

順治丙戌進士蔚州人  
終刑部尚書謚敏果

于公可託

順治乙未進士  
同年文登人

戶部福建司員外郎程可則

順治壬辰會元南海  
人終桂林府知府

沈振豪

貢生山  
陰人

戶部主事王如辰

順治乙未進士同年膠州  
人終廣西提學道僉事

戶部四川司員外郎佟湘年

奉天人終瓊  
州府知府

翰林院掌院學士兼禮部侍郎陳廷敬

順治戊戌進士同年歷  
吏部尚書今刑部尚書

葉公方藹

順治己亥進士及第終刑部侍郎加禮部尚書謚文敏

國子監司業劉公芳詰

順治辛丑進士宛平人

詹事府詹事兼翰林院侍讀學士加禮部侍郎沈公荃

順治壬辰進士及第華亭人謚文恪

郭公榮

順治壬辰進士清苑人終內閣學士兼禮部侍郎

禮部尚書兼掌翰林院詹事府事張公英

康熙丁未進士桐城人

詹事府少詹事兼翰林院侍講學士周公之麟

順治己亥進士

蕭山人終通政使司通政使

盧公琦

康熙丁未進士仁和人終內閣學士兼禮部侍郎

田公喜霽

順治辛丑進士馬邑人終內閣學士兼禮部侍郎

都察院掌院事左都御史陳公廷敬

見上

于公成龍

奉天人兼管都統

協理院事左副都御史李公迥

康熙甲辰進士壽光人終刑部右侍郎

左僉都御史周公之麟

見上

兵部督捕左理事官羅公秉倫

康熙癸丑進士江寧人終通政使司通政使

勞公之辨

康熙甲辰進士石門人太僕寺卿



右理事官宮公夢仁

康熙庚戌會元  
終福建巡撫

錢公晉錫

拔貢太倉人  
順天府尹

顧公藻

康熙丙辰進士  
崇明人由翰林院侍講改終工部右侍郎

督捕衙門例以每年四月彙題一年八旗逃獲之數別

有綠頭牌奏知逃官逃兵若干員名止紀總數以備

問人名地名不能悉也而捧牌啟奏係滿洲堂官專責

乾清門啓奏

上問侍衛馬三捷逃往何處席珠不能對士禎久不解

國語遂蒙

上諭下吏部都察院察議堂司官左都御史于公成龍  
言綠頭牌啓奏漢官例不與聞與公無涉席珠公亦云  
然予曰不然滿漢堂官平日共事一堂又同啓奏小有  
利害輒分彼此既非大臣之體又非協恭之誼某不忍  
為也于公與副都御史徐公潮深歎服謬許有古大臣  
風且云

本朝此事惟一見於魏敏果公

象樞

今乃再見公耳于公

至內閣又申言之然予與席珠公等竟同一口供上遂  
俱議降一級留任仍罰俸一年蒙

聖恩予與漢理事官勞公之辨照部院議而席珠公等  
三人皆降三級隨旗上

朝吏部尚書李公天馥亦語侍郎彭公孫適曰王公不失厚道  
然未免過於忠厚吾所不能掌院學士張公英云公此一事  
起居注諸公皆傳道之

李侍讀漁村

澄中

滇行日記載板橋驛驛壁有題句云滇

海盈盈一水遙解鞍明日問歸橈還如謝朓宣城路南  
浦新林過板橋甚有風調不知誰作也按此升菴詩也  
題作于役江鄉歸經板橋首句千里長征不憚遙滇程  
記云楊林達板橋號三亭實六亭

克什兔者紅帶宗屬自四川隨征回京至鳳翔病疽危  
甚有張希仁者業瘍醫藥之而愈克什兔遂攜入京師  
張有子玉女蛇妃等九人克什兔利之私作謠契誣以  
賣身及張歸鳳翔克什兔即以逃人告提比解至部獻

得實予與席珠公斷張夫妻子女歸復版籍為良民克  
什免送宗人府察議克什免怒牒訴掌宗人府郡王郡  
王召侍郎等辨質克什免刀悍甚然紬於理府是部議  
克什免革職鞭責疏上得

旨依議予在部不敢以強禦散法率如此聊記此一事  
不及備書也

湯尚書荆峴

斌

巡撫江蘓毀上方山五通祇廟撤土偶

扑之而投諸水有人於地中得古石碣上刻肉山酒海

遇湯而敗八字云仙人張三丰書也烏程陳煉師說  
山東巡撫題報部撥陝西協餉銀九十萬兩已解本年  
地丁錢糧銀四十五萬兩其未解銀四十五萬兩儘徵  
儘解奉

旨陝西需用銀兩已將戶部庫帑撥給這未解協餉若  
不拘定限儘徵儘解恐致累民著不必解送仍留該省  
候部撥用同日戶部奉

旨西安鳳翔各屬二麥無收供應軍需賑恤民生俱關

緊要着將爾部庫銀撥一百萬兩作速解送陝西支用  
先一日內閣傳

上諭諭九卿以

聖意如此臣士禎恭對曰普天之下皆

朝廷赤子

皇上軫念秦民不惜公帑百萬朝發夕至起白骨而肉  
之恩至厚矣又軫念齊魯之民停協解以紓民力真天  
地父母之心無不覆載者也嗚呼

九重之上慮周萬里宵旰憂勤惟懼一夫不得其所聖  
帝明王憂民至此者古今能幾見哉忝備員九卿謹備  
識之

四月中屢

諭九卿會議西安鳳翔賑濟事宜十八日內閣傳

上諭畧云西安鳳翔饑荒朕在宮中夙夜軫念有從陝  
西往來人員必親加詢問頃四川巡撫噶爾圖來京陛  
見問所過陝西州縣情形噶爾圖奏稱西鳳二府百姓



流亡者多以饑餒其疾疫而死者亦間有之不勝惻然  
云云議得捐納人員應令於布政司及西安鳳翔二府屬  
各州縣聽便捐納仍特遣大臣會同該督撫不論捐納  
及撥解銀兩并運送米石於被災州縣作速通行給發奉  
旨着戶部尚書王隲工部尚書沙木哈去先是遣兵部  
尚書索諾和往勘災未回再有是

命

康熙丙寅睢州湯公斌自江寧巡撫

特旨加禮部尚書召還掌詹時正詹為清苑郭公棻二  
公同時未幾郭遷內閣學士去不另推補及湯遷工部  
尚書則以禮部侍郎掌翰林院事桐城張公英兼掌府  
事張遷工禮二部尚書皆兼掌翰林院詹事府迄不另  
推云

王翬字石谷自號烏目山人常熟人畫與太倉王太  
常時敏王廉州鑑齊名江左稱三王辛未來京師頗  
自貴重其畫不為人作獨欲得予一詩為贈屢屬諸

公通意於予又特作長幅及冊子八幅相遺其意濃  
至可感竹垞題冊後云王翬老去畫尤工小幅吳裝  
做惠崇曾上北高峰頂望村村風景似圖中八幅其  
一做大癡溪山雨意圖一做王叔明小景一題夕陽  
山外山做巨然一做趙吳興采菱圖一做北苑一做  
黃子久天池石壁圖一寫唐伯虎詩意詩云吳山多  
近打魚磯磯上家家住翠微曉日五竿人未起查查  
山鷓遠簷飛又十月江南未隕霜青楓欲赤碧梧黃

停橈坐對西山晚新雁題詩小著行

海淀在明時有戚里李氏園米太僕仲詔

萬鍾

勺園亦在

卒即葬焉

暢春御園落成而米之墓逼近苑外其家欲改卜

上知之特傳

旨令勿遷仍許歲時上冢如常

上之曲體人情如此真盛德也

命九卿會議京口荊州截留漕糧令該駐防將軍以兵

船各運十萬石至襄陽以西安鳳翔雨澤愆期秋成未  
可必也

內閣傳

諭九卿及翰詹卿寺各衙門堂上官書嵩山中岳廟濟  
瀆神祠孟子遊梁祠二程子祠扁額各四字進呈曰嵩  
高峻極曰靈瀆安瀾曰昌明仁義曰功存河洛先是河  
南巡撫閻中丞興邦恭請

御書也

國子博士孔尚任東塘精於音律常得漢玉羌笛唐製胡琴各一枚形製古雅自為跋刻之云康熙壬申官京師獲玉笛吹孔之下止具三孔世無識者考之馬融笛賦稱笛出於羌舊四孔京房加一孔於後以備五音所云四孔者乃連吹孔數之其底原有洞孔故加一孔而五音備焉後之長笛又加二孔以應七律許慎說文注笛七孔竽羌笛三孔是也其曲有落梅花折楊柳古愛其曲多為玉笛吹之此笛色如柳花蓋古之甘黃玉也

雙鉤碾製肖形竹節頂節二寸中節八寸尾節五寸較以漢尺分毫不爽應劭風俗通載漢武帝時丘仲作笛長尺四寸今長尺五寸且無後孔當在漢之初年矣噫古器存而古音莫解笛之三孔亦猶文字之一畫也與

右跋漢玉羌笛

胡琴本北方馬上樂亦謂之二絃琵琶蓋琵琶所托始也南部新書載唐韓晉公滉入蜀伐奇樹堅緻如紫石匠曰為胡琴槽他木不能並遂為二胡琴曰大忽雷小忽雷後獻德皇樂府雜錄云文宗朝兩忽雷猶在內庫內

侍鄭中丞特善之訓注之亂始落民間康熙辛未予得  
自燕市蓋其小者質理之精可方良玉雕鏤之巧疑出  
鬼工今八百餘年矣頻經喪亂此器徒存而已無習之  
之人俗藝且然傷哉

右跋唐  
龔胡琴

又嘗於慈仁寺市得前代內

府琵琶二賦詩曰喬木世臣事已革零書破琴存故國  
每逢舊物重摩挲必詰此物何從得廟市曾收兩琵琶  
琵琶製作不同各臻極其一龜錦褰周身剪犀鏤牙如縷  
織背上雙紐蹲盤螭盈尺曲柄玳瑁飾雲楸作面波濤



生三十六峯更奇特橫挾不起斜按難滿輪明月遮胸  
臆其一瘦削美人肩螳螂匙頭蜻蜓翼水波雷文到四  
邊碎砌檀槽百衲式異寶妝成兩樹花牡丹秋菊真氣  
逼不似螺蛳非碑碣剔硃填漆無顏色次第傳觀反覆  
猜旁有老伶長太息前朝琵琶屬教坊玉熙宮中數承  
直方響前列琵琶隨一派韶音揚舜德先皇顧曲愛繁  
絃天府之藏示樂職大者名為大海潮南宋流傳今到北  
四絃彈動殷殿庭却疑腕中萬斛力小者斲從萬厯初

內府金錢費千億年年風露催白頭才人懷袖聲啾唧  
聽來恰似秋蟬吟針鋒細字將名刻大聲宏亮小聲清  
雄鳴雌和無差忒龍錦囊中只兩張舊時中侍皆能識  
可惜淪落在市塵四十八年塵漬黑折軸斷品誰安排  
玉帶銀撥漫拂拭有腹無絃訴怨難撫今懷古中心惻  
造者前王毀者誰甲申三月遭流賊

右詠大海潮小  
吟蟬兩琵琶歌

徐宗伯學謨冰廳劄記云昆陵唐荆川順之始以宮僚  
言事削籍海內有景星慶雲之望繼倭亂江南趙文華

薦之朝起南兵部郎轉北至京朝士爭往候之荆川闔門謝客客至常不得見及報謝自九卿外庶僚惟翰林科道吏部而已是時分宜當國久勢傾中外欲借荆川為名高日令其子置酒致款洽荆川儒者一見隆重遂為莫逆以謂可附之行道不知入其牢籠也巡邊之役分宜享之西苑直房飲以薏苡酒荆川以為佳分宜曰酒故薊遼王總督餽予酒則一年佳一年官却一年不佳一年荆川頷之至薊欲馳總督甬道王公自以帶兵部堂銜難

之荆川殊怏怏還朝先以巡邊疏稿託白儀制啓常呈  
世蕃內叅王公至數百言世蕃覽之大驚曰此疏入王  
公械逮矣乃以筆盡刪去止留一卒不練誠如聖諭云云  
四句乃得秋後處治之旨朝論以惹惹酒之語謂荆川  
為嚴氏報効此其故不可知矣如宗伯所言王司馬思  
質之獄發指雖由相嵩荆川實為搏擊何殊文華之媒  
孽張半洲耶李中麓開荆川至交也常遺之書曰此一  
起官頗紛物議出非其時託非其人將舉平日所守而

盡喪之矣又云或佛肝欲往之意也豈知其終是不可哉蓋良友之言如此

大興劉顯績字元公明崇禎丁丑進士順治初官給事中終陝西僉事有知人之鑒前明崇禎癸未會試為同考官得大學士成公克鞏刑部尚書謚端恪姚公文然學士魏公天賞順治丁亥會試再為同考官得大學士王公熙大學士李公之芳太常卿一甲第二程公芳朝修撰一甲第三蔣公超而四川按察使宋公琬詩家宗

匠亦本房也視朱平涵相國湧幢小品所載吳中丞維  
嶽以嘉靖丁未分考得張相居正殷相士儋陸尚書光  
祖汪侍郎道昆胡太常正蒙胡又會元也前後可以方  
軌然劉得人二次尤奇

士禎以順治辛卯羈貫中山東鄉試是科同考得人極  
盛者餘杭孫應龍海門以德州知州閱書經得七人為

安邱曹澹餘申吉吏部侍郎大嵩李望石贊元

榜名立

兵部

督捕侍郎樂安成愚崑其範兵部侍郎鄒平馬右實光

監察御史平度崔老山誼之通永道僉事禹城盧公鉉  
鑄鼎淮安府推官膠州韓名卿魏衡州府通判七人皆  
登進士李成馬皆嘗以御史巡鹽而成與馬又皆兩浙  
孫之桑梓也時年七十餘家居尚無恙士禎以詩經出  
壽州夏侍御敬孚先生人之門忝冠本房初擬解元改第六今官經  
筵講官刑部尚書安丘劉子延祚遠巡撫順天副都御  
史日照李宗周簞官知縣子應廬內閣學士兼禮部侍  
郎抑亦其次今先生年七十九矣清健如五十許人

今吏部尚書李容籛天馥禮部尚書前大學士熊青岳  
賜履兵部尚書杜肇余臻刑部尚書前吏部尚書陳說  
巖廷敬皆順治戊戌進士同時領六卿前此所少

長洲宋文恪德宜善擇壻王藻儒揆內閣學士兼禮部  
侍郎顧懿樸藻翰林侍講改兵部督捕理事官顧雨若  
用霖西充知縣陳廣陵元龍翰林編修李丹壑孚青翰  
林編修五人皆進士其四入翰林文恪子大業亦翰林  
編修



上海姚公永濟字通所明萬曆戊戌進士歷官浙江左布政使至順治十五年戊戌尚無恙與戊戌新進士叙同年之誼時人傳為盛事先是崇禎中先祖康宇公官浙右轄與姚公共事相得甚懽姚公丁丑入覲以考課不及額下詔獄先公署篆悉以徵解完姚公考成遂得復任率子孫詣先公謝曰活我者公也鼎革後先公田居尚無恙辛卯外兄高念東珩以翰林侍講學士典江南試先公附書問訊姚公答書殷勤道契闊士禎是秋

領山東鄉薦猶及見之先公是歲壽九十一又二年癸巳  
考終後五年為戊戌姚公尚在蓋近百歲矣

明彭吏侍華為庶吉士其兄文憲公時以學士教習然  
猶三從兄弟康熙癸丑崑山徐宮允秉義果亭以鼎甲  
第三授編修入館其母弟相國立齋以翰林掌院學士  
司教習具疏題明

特旨免秉義教習曠典也乙丑會試華亭王戶侍鴻緒  
儼齋為總裁其母兄編修九齡為同考試官尤為僅見

李少司馬厚菴言在江淮晤督學許贊善汝霖傳治失  
血方云高郵一學官年八十二有少容自云少患血症  
得異人傳此方服之良愈久服老而益健其方用青布  
不用五梧子者於荷稻或草木上接秋露最潔者取其水以磁瓶  
盛之分為十八碗作三次服每次六碗入人參湯五分  
冬蜜人乳各一鍾煎溫服

李少司寇奉倩言得一秘方治疫氣傷寒等症最効其  
方用麥門冬三錢烏梅三枚棗三枚芫荽梗三十寸燈

心三十寸竹葉三十片熱煎服

厚菴扇繫一物色如伽楠而不堅無香問之曰粵西梧州所產鯖魚膽也用少許和水點眼疾立効然不必多用又粵西山羊血治血凝滯如神其家一僕偶墜艙底艙深丈餘及救甦遍身血暈療之漸痊惟頭目岑岑作苦既三年矣偶得山羊血治之頭風立除

南工侍懷仁大西洋人嘗言其國取珠有如雞卵大者螺蚌亦絕大有臭腐者則夜明珠產其中其法不用剖

取惟以殼曝日中久則蚌渴吐珠弄之伺其吐急取可得  
晉江黃給事熙纘字敬菴嘗為安慶府推官予與順治  
庚子同為江南同考試官以己亥城守功內陞其僕人  
一日得大螺將煮食之湯忽沸有聲甚巨螺忽自釜躍  
起室內氣如烟霧不辨人皆驚而走匿移時視之螺死  
有珠如龍目大在其側以經水火晶光遂減秤之重三  
錢亦夜明之類

李厚菴說明末閩中神祠土木偶及人家家祠木主皆起自行

少司空齊穡公言察兒罕國元之嫡派也世雄長西北  
諸部傳至靈丹可汗在位久忽欲往西域皈佛教其台  
吉那顏等苦諫不聽國中無主

太宗皇帝因發兵追降之其尚璽近侍以傳國玉璽倉  
卒坎地而霾之兵既退有童豎牧羊其地一羊屢至坎  
所蹄之不已驅之復來牧覺有異試發土則璽見焉聞  
於官遂進

上時天聰某年也今藏

御府予按何文肅喬新椒邱集有傳國璽志一篇敘述甚詳五代後唐從珂時秦璽燬石敬瑭入洛更以玉為之重貴獻之遼興宗試進士遂以有傳國璽者為正統命題金滅遼延禧遺傳國璽於桑乾河元世祖時有札剌爾氏者漁於桑乾之濱得之夜有光監察御史楊桓辨其文以為歷代傳國璽上之至正末中山大兵至燕順帝攜之北遁沙漠其本末如此以文肅言考之自五代之亂璽歸於遼遼歸於金金歸於元在察爾罕國者又二百餘年而歸於

本朝詎偶然哉又按王冕詩青象不將傳國璽紫駝空  
引舊氊房蓋未詳矣

門人楊吉士名時江陰人向屬其訪宋胡恢南唐書及  
元席帽山人王逢集適來言胡本李忠毅公仲達家舊  
有之亂後其家零落不可得矣原吉

逢字

梧溪集凡七卷

有至正間新安汪澤民鄱陽周伯琦二序景泰中南康  
府知府陳敏政後序細書工緻似鍾太傅終卷如一云  
是周硯農榮起手錄周江陰老儒常熟毛子晉刻較古



書多其刊正尤精六書之學其子長源字鄴侯予在淮南時從遊門下甚久覲農年八十七乃卒今歿才五六年耳書雖八分信可寶也女禧祐皆工畫禧名尤著予昔在江南嘗得其畫惜花春起早詩意士女一幀又嘗屬江陰知縣陸次雲訪其所畫楚詞九歌九章圖陸在江陰數載不相聞聞已購得裝潢而未寄予也當問之吳中閨媛文俶字端容寒山趙靈均之配工於寫生梁谿太學浦生貽其所作花卉草蟲十二幅雅淡有生氣

昔聞有著色本草一部惜未見

米南宮寫陰符經墨蹟細行書結構精密神韻溢於楮  
墨與世傳刻米書迥別大似褚河南也首有黃帝像兩  
童子奉劍印侍前有一鼎後題甲申初夏廿日南山米  
老學書課凡十三字經後書元章及劉巨濟倡和龍真  
行二篇字尤妙云龍真行為元章待制林公書跋云祕  
府右軍書一卷有一龍形真字印故作此米芾詩龍形  
真字芸香裏伏日道山聊一啓媪來鵝去已千年莫怪

癡兒收蠋紙蕭衍老翁食無肉錦質繡章能獨侈不知  
劫火付冤家却誤葛仙求令史文皇有金無鑒目賴取  
穹官齊押尾徐生小點辨茅簷不道天真難力至晚薄  
功名歸一戲一奩充勝三公貴牡丹不語人能醉墨光  
覺勝朱鈇媚與身俱生無術治又染膏肓劉巨濟後有  
劉涇和秦火蕩焚天地赤孔堂壞後無餘壁不知科斗  
六書文化作龍蛇二王跡集賢他日作仙久官姓篆章  
存歷歷自憐黃眼未親逢一段因依徒奪魄元章揮灑

早驚動秘篋墨皇曾敬識孤標未要後生知劣許下官  
論莫逆好竒舉世不多肯神物尤來終變易神鋒雙合  
會有時真璽一飛無處覓頗聞秘篋作訛語別有撥龍  
招異客不知乾沒歸去來勝在箇家遭水厄米芾自命  
此書為跋尾書惟題於家真蹟後不寫以遺人關樞密  
太尉論書詣真前篇有天真難力至語後篇知劉核收  
書自芾始故寫獻其後有跋云米氏小錄云宣和間聖  
主命寫小楷故倣右軍黃庭少酬聖意不能以備御覽

也余留京師購得此帖命工裝潢與諸子習書誠可寶  
愛堅白老人敬題

居易錄卷十八